

INDUSTRY KA NGAIHTUAH A...

Lallunghnema
Charity Lodge
MB - 9402321590
April 26, 2018

|um khat chu Industry Deptt. officer pakhat Pu Dawnga (Dawngzalala) hian min rawn phone a, chutia kan inbiak lai chuan ka mut hmunah industry chungchang hi ka ngaihtuah zui ta chiam mai a. Zan mut zai reng reng rel lovin industry hnathawh leh a kaihnhawihte chu kutzung\ang thliak hmak hmakin ka chhut a. Industry-in a huam zauzia ka chhui chhuak tam tual tual a. Engkim mai hi industry a\anga chhuak a nihzia pawh ka chhui chhuak ta hial mai a. Tunhma zawnga industry ka lo hmuh dan leh hriat dante chu tihdanglamin a awm a. Ka thu tawpna chu, 'Industry hi a va lo ropui em ! Industry hian engkim mai hi a huam a nih hi. Industry tel lovin kan nung thei lo. Industry chu ram hnuk a ni. Industry chu Zoram hmasawna atan 'a thling, Alpha leh Omega' a nih hi; engkim bul leh tawp chu industry hi a nih hi ! ka ti thei ta a ni.

Kei thingtlang pa ni ve si, kut hnathawh ngaina lo ber, hnathawh ze lo ber leh kut hnathawha eizawn tum ngai lo; chempui leh tuthlawh hmelhriat tum reng reng lo hian Industry leh a hnathawh ropui takte chu ka han chhui zauva, Industry hi ngaihnep chi a lo ni hauh lo mai. Industry hi hmasawna hnukpui ber a nih hi a ! Mipui pawh Industry-ah hian kan harhchhuah a va \ul ta em ! tiin ka harhchhuak ta a ni ber mai. Camping emaw crusade emaw a luh ngai lovin Testimony ka chhar, ka ti hial a ni.

Industry hi \awng bul lamah chuan Laltin \awng a\anga lak a niin, *Industria* tih a ni a. Khawvela Dictionary hmingthnag ber zinga mi Oxford, Compact, Reference Dictionary chuan heti hian a hrilhfiat a, '*the manufacture of goods in factories, a branch of economics or commercial activity, the tourist industry*' tiin *hard work* ti pawh a telh leh zel a ni. Mizo \awng chuan, taimakna, thil siamna, sumdawna kawng, tiin a sawi theih a ni. Chuvangin, he thil Industry hi a lo rilin a thuk a, a huam zauvin thlen loh chin pawh a lo nei hauh lo mai le !

Mizo ho hian ngaihdan mawlmang tak leh nghet tak si kan nei \hin a. Industry kan hmelhriat dan pawh hi a letling hu mai a. Mithiam inti tak tak, inti fing ho pawh hian Industry hi kan man fuh lo hle. Mipui mimirin kan lo hriat ve danah chuan Industry chu khawl lian pui puia thil siamna chauh a ni a. Industry Deptt. chauh hi Industry-a thawktute an ni kan ti fo \hin. He ngaihdan leh thlir dan ho leh mawl lutuk hi kan bansan a hun ta tiin ka ngaihtuah chhuak ta zel a ni.

Hotel-ah te, Restaurant-ah te, Tea Stall-ah te i chawlh chuan i hmuh hmasak ber tur leh nangmah lo hmuaktu hmasa berte chu Industry kutchhuak vek an ni a. Chung Restaurant leh thingpui dawrah te chuan i \hu a, i \hutna chair chu plastic product a ni emaw, thing manto tak taka siam eng anga mawi leh nalh pawh nise, Industry kutchhuak liau liau a ni tih hria ang che. Chutiingin dawhkan leh chair te chu thir \ha chi a ni emaw, nilo emaw, eng ang hmanrua pawh nise, Industry thiamna hmanga siam an ni tih theihngihl ngai reng reng suh ang che. Thingpui i order em? Eitur dang i order em? I order-na hmanrua pen te pawh pawh kha Industry thil vek zu nia mawle ! Eitur chi hrang hrang dang chow, rice, dahi, eng chi pawh ni raw sek sek, Industry thil siam vek a ni tho mai. Eitur tuihnai dang changkang tak tak waiter ten an chhawp che pawh kha Industry khawl hmanga siam vek zu nia mawle !

Kan chenna In leh lo te hi han thlir vel ila, Industry tel lova In leh lo din hmun tur pakhat tē mah a awm lo. In sakna hmanrua chi hrang hrang cement, rangva, rod, perek, tuboh te kha Industry kutchhuak vek a nih kha. Balu pawh hi lui a\anga lak a nih rualin hman tlaka siam tur chuan Industry khawl tho a ngai. Khawl hmanga balu siam pawh kan uar tak viau hi. Hei hlei hlei hi tui pek hneh pheichuan luia balu lakchhuah ai chuan a char \ha duh zawk an ti leh zel nia mawle !

In sakna hmanrua piah lamah hian kan incheina chi hrang hrang mi them thiam ten an duan chhuahte pawh hi Factory pum chhuak vek an ni a. In \ha leh ropui fahrang chhunga chengte eitur pawh Industry thil tho a ni. Tunah pheichuan chaw siamna Food Processing Industry kan ti leh ta zel a. A nih dan ang ngau ngau chuan chaw hi a tui vek lem lo. Zo chhangte pawh hi a tui kan tih rualin chhum tui thiamte pawh a ngai ve leh ta zel a. Chu chhang chhumna atana hmanruate chu Industry thil siam zinga mi a ni leh zel.

Han chhut chet chet hian Industry hi a pawimawh satliah lo hle mai. Thil pawimawh rau rauah pawh a tel lova ding thei lo, kal thei lo, che thei lo, mu thei lo, \hu thei lo kan ni vek mai. Damdawite pawh hi thil siamna hmun factory a\anga siam chhuah vek an ni. Zep thu pawh a cheng lo ve. A zau zawnga ngaihtuah pheichuan mit ngeia kan hmuh theih thil zawng zawng hi Industry pum chhuak vek an ni mai. Mizoram Deptt. zawng zawngte hmasawna leh hlawhtlinna chu Industry-ah a inngat ta vek a ni.

Khawvel ram zau zawk kan thlir chuan Industrial Revolution te khan khawvel ram hmasawna nasa takin a her danglam a. Lo nei mite thawh chhuah tih hmasawna kawngah pawh Industrial Revolution hi a \angkai em em a. He Revolution a\ang hian khawla hnathawktute leh kut hnathawktute inkarah nasa takin harh tharna a lo thleng a. Khawl thar chi hrang hrang din a lo ni a, tihdan thar a lo chhuak ta zel bawka. Ram pumpui tan he thil siam harhtharna thli hian nasa takin kawng zau tak a lo hawng ta a ni. Industrial Revolution chu sap ram mai ni lo khawvel pumin an chhawr em em a ni.

Ram hmasawna ruahmanna (Planning) te pawh hi Industrial bul \ana a tawpna thlen tur thil vek a ni. MNF sorkar hunlai khan sorkarin MIP policy a nei \hin a, Congress

hnuaiah NLUP leh NEDP te a awm bawk a. Heng ho zawng zawng bul leh tawpna chu Industry hi a ni. Sawi tur a va tam em ! Kei mi naran hian ka hril thiam lova, ka puang seng hek lo. Industry Deptt. in kum khat chhunga Revenue an lakluh te hi a tam namen lo khawp mai. Zoram sorkar pawisa bawma sum thehlut tam ber zinga mi an ni tih a ni nghe nghe a. Heng thu hian kei tehlul hi min tilawm veng veng nia mawle !!

Industry Meichher
Jan-Mar, 2018